

害事初覆鄭光弼曰此兩人皆已服矣然二人之罪恐有輕重也 上曰不分輕重一律罪之則後必軍無統令矣辨其輕重罪其主將則軍法亦嚴矣必差輕○政院啓曰韓必已令減死但必減死而不知其所以減死之意則後日見之恐不明白大抵必非主將故特減死罪今下判付亦書此意何如傳曰如啓○丙申 御朝講○臺諫啓前事不允

十月丁酉朔○臺諫啓前事不允○夜雷動○戊戌 御朝講○臺諫啓前事不允○己亥 御朝講○臺諫啓前事不允○傳曰朝經筵李紱言當擇世子嬪預養之其言甚好世子年未滿十歲不宜早婚然其配則不可不早擇而預養也○夜西方有氣如火○庚子 御朝講執義鄭應麟司諫曹漢弼啓前事 上曰李光植李培根適之可也餘不允領事南袞曰十月之雷變之大者臣等無狀其致此乎 上曰災變必非虛發頃者之雷予心未安同知事洪淑曰臣聞頃者雷動八九月之間則或有之十月雷鳴則災之大者然可弭之道正在修明政事側身修省應天之事自古有之其當考而行之南袞曰自上因灾敬懼政事所關無所不謹則災反為福一念或忽則其為灾尤甚矣○辛丑 御書講○臺諫